



Las Squadras

1

Informaziuns generalas e messadi tier la radunonza communal dils 12 da zercladur 2012

Messadi per la radunonza communal dils 12-06-2012

Messadi per la radunonza communal dils 12-06-2012 allas 20.00 uras en casa da scola a Rabius

La suprastonza communal suttametia las suandontas fatschentas:

1. Avertura e beinvegni
2. Elecziun da 2 dumbravuschs
3. Approbaziun dil protocol dalla davosa radunonza communal dils 10-05-2012
4. Rendaquen 2011
5. Rapport dils revisurs ed approbaziun dil quen annual 2011
6. Orientaziuns
7. Varia

Tractanda 3: Protocol

Dil protocol dalla radunonza communal dils 10-05-2012 sa vegnir priu investa sin canzlia communal durant las uras da spurtegl. Avon radunonza ei il protocol ultra da quei exponius per investa. Il protocol sa era vegnir abonnaus per la summa da frs. 25.00 per onn tier l'administraziun communal.

Tractanda 4: Rendaquen 2011

Il rapport da gestiun e quen 2011 che ei vegnius repartius a mintga casada dat sclariment en detagl sur dil quen communal 2011. Plinavon cuntegn el las ulteriuras informaziuns usitadas.

Ord quei motiv vegn quella tractanda buca presentada specialmein en LAS SQUADRAS.

A caschun dalla radunonza communal vegnan il canzlist ed il president communal plinavon a dar sclariment detagliu sur dil quen communal 2011.

Tractanda 5: Rapport dils revisurs ed approbaziun dil quen annual 2011

La cumissiun da quen e gestiun sut il presidi da *Ciril Cathomas* ha controllau ed examinau il quen communal. Sin fundament d'art. 49 dalla constituziun communal succeda la controlla aritmetica dil quen communal entras in biro fiduziar. Quell'incumbensa ei vegnida exequida dil biro fiduziar Cathomas + Cabernard SA da Glion. *Marcus Holderegger* e *Giuliana Gienal* dil biro Cathomas + Cabernard han fatg la revisiun dil quen e dalla contabilitad

en collaboraziun culla cumissiun da quen e gestiun. Ils rapports detagliai dalla cumissiun da quen e gestiun sco era quel dil biro fiduziar ein d'anflar el rapport da gestiun e quen 2011.

Sin fundament dil resultat dalla revisiun propona la cumissiun da quen e gestiun alla radunonza communal:

- d'approbar il quen communal 2011 sco presentau a scret,
- da dar scarica alla suprastonza, als ulteriurs organs responsabels ed all'administraziun e d'admetter in cordial engraziament per lur engaschi en favur da nosa vischnaunca.

Il Legn

Sligiaziun dil davos legn en "Las Squadras" nr. 2/matg 12

La fotografia muossa la tabla commemorativa vid il grep sper la punt gronda (punt Russein). Ord las 3 sligiaziuns correctas ei il victur dallas duas cartas dad ir cul tren vegnius tscharnius e senumna Adalina Schnoz-Carigiet da Sumvitg.

Niev legn

Nua ei quei maletg e tgei muossa quel?



Tarmettei Vossa sligiaziun per posta, per fax ni per e-mail alla administraziun communal entochen ils 30 da zercladur 2012.

Per participont(a) vala mintgamai mo ina sligiaziun. Denter las sligiaziuns giestas vegn tratg la sort. Sco premi dat ei duas gadas ina carta dil di per ir cul tren ell'entira Svizra ella valeta da mintgamia frs. 40.-.

Fiasta d'inauguraziun dils stabiliments d'albiert, Alp da Glivers

David Deplazes, amarenda

Ils 1 da fenadur 2012 astgein festivar l'inauguraziun dils stabiliments novs a Glivers dadens sut e selegrein d'envidar convischins e convischinas dalla vischnaunca da Sumvitg e naturalmeins era tut ils interessents d'ordeifer a quella fiasta alpestra. Plinavon lein dar in pign sguard el menaschi agrituristic previu.

Program da fiasta dils 01-07-2012

- **Spasseggiada communabla ad alp.** Interessai serimnan allas 8.00 a Plaun da Cruschs (parcadi davos Miraval).
- **11.00 messa campestra** e benedicziun dils stabiliments.
- **Surdada dalla clav.** La corporaziun d'alps Sumvitg, sco patruna dils novs baghetgs, surdat ufficialmeins la clav ad Amarenda che surpren il menaschi agrituristic a Glivers.
- **Gentar** - pulenta cun groma, carn giu dil grill...
- **Investa dils stabiliments novs.**
- **Occurrenzas e giugs** per pign e grond.
- **Velocipedists** vegnan honorai specialmeins e san far part dad ina tombola.
- **Autos** san carrar quei di senza lubientscha sil tschancun Siltginas-Alp Glivers.
- **En cass da malaura** ha la fiasta liug en stalla, en cass da stempraus croda ella ora! En gliez cass saveis s'informar la sera avon sin www.amarenda.ch

Niev albiert en stalla dad alp

Tschun onns ein vargai, dapi che l'idea da guder las alps da Crapner e Glivers dadens era a moda turistica ei naschida. Avon in onn ha giu liug l'emprema badelada. Ina part dalla stalla da Glivers dadens sut ei vegnida baghegiada ora, ils indrezs possibiliteschan als visitaders da prender albiert si d'alp. 30 «treglias» modernas, ina stanza da magliar, la cuschina, gardaroba e tuallettas stattan a disposiziun. L'idea da tener tut sempel, natural e bienmarcau ei magari vegnida trubistgada dallas pretensiuns dalla lescha da victualias, dalla polizia da fiug ni digl uffeci per la natira ed igl ambient. Las lavurs ein vegnidadas surdadas per 97 % a nos buns mistergners ella regiun. Ellas ein vegnidadas exequidas - sco quei ch'ins sa giudicar entochen dacheu - per cumpleina cuntenientscha.



Devisa dil project: Svegliar capientscha e buca forsà far sco sche...

Eran nossas pastiras dad alp entochen avon paucs decennis indispensablas per il surviver dall'agricultura muntagnarda e tochen il davos dall'entira populaziun en nossas valladas alpinas, vegnan ozildi biaras alps el Grischnun, cunzun alps meins bialas gnanc pli

cargadas. Autras ni plitost ulteriuras strategias da surviver els cuolms - era enteifer l'agricultura - paran dad esser ozildi pli impurtontas che la producciun da carn, latg e caschiel. Cul product vegn era vendiu ina historia, forsà in mitos e pli e pli san ins era vender igl eveniment...

Igl ir siado, ver moviment ed esser ora sut l'aura, forsà schizun il ver part dalla veta dad alp, ei per biars da nus in grond basegns, per bia glied dallas aglomeraziuns in siemi. Perquei ei naschida l'idea da buca mo schar pascular ils tiers e producir caschiel sin l'Alp da Glivers, mobein era da schar prender part il hosp activameins dalla veta si d'alp. Sper la cultura dad alp, duei denton era la natira alpina esser ina tematica centrala dallas purschidas.

Naturalmeins ch'igl ei buca pusseivel per il hosp, che vegn forsà schizun en gruppa, da sentir cun la medema intensidad la veta dad alp sco il starler e siu buob ch'ei l'entira stad pli u meins persuls enta Russein. Las finamiras ein denton il possibilitar al hosp experientschas positivas ed enrihontas, il sensibilisar il hosp per il spazi da viver ella muntogna e dad encurir il dialog denter muntagnards e quels dalla Bassa. La devisa duei esser svegliar capientscha e buca forsà far sco sche...

L'aventura sin l'alp da Glivers - Menaschi 2012-2013

stad 2012: 01.07 – 30.10.2012 sondas e dumengias star sur notg e menaschi d'ustria. Gruppas ed occurrenzas sin damonda era duront l'jamna. Uras d'avertura, -> www.amarenda.ch.

Cunquei ch'il personal vegn pér engaschavon naven da 2013, sa la tegia veglia vegnir fittada duront la stad 2012 per in cuoz da minimum 5 dis. (negina affittaziun duront catscha a catschadurs).

unviern 2012/2013: Ils stabiliments ein aviarts per gruppas sin damonda.



Momentan vegnan elaborai differents moduls cul tema cultura dad alp e natira alpina en collaboraziun cun il Center da Capricorn - Fachstelle für naturnahen Tourismus a Wergenstein. Empremas experientschas cun quels moduls savein rimnar quest'atun. Medemameins vegn era la reclama messa en moviment il proxim temps. Cheu astgein guder il susteniment dil post cantonal d'agriturisssem (Fachstelle für Agrotourismus Graubünden). Naven dalla stad 2013 duess il menaschi lu porscher ina schelta da purschidas era sper il menaschi d'albiert - nus selegrassen naturalmeins grondameins dad era astgar beneventar enqual indigen sin l'alp da Glivers.

Sin seveser ils 1 da fenadur si alp Glivers Caschada alp Glivers ed amarenda